



Fai 'e Elder M. Russell Ballard

'O e Kōlomu 'o e Kau 'Aposetolo 'e Toko Hongofulu Mā Uá

Ko Hono Ma'u e Fiefiá he Tokoni 'Ofá

Fakatauange te tau fakahaa 'i 'etau 'ofa mo e hounga'ia 'i he feilaulau fakalelei 'a e Fakamo'uí, 'i he tokoni manava 'ofa mo faingofuá.

Kāinga, 'oku ou 'amanaki pē 'e faka'aonga'i 'e kimoutolu 'oku 'a'ahi mai ki Sōleki ní e faingamālie ke fiefia he ngaahi lanu mo e 'alaha 'o e matalá 'i akau faka'ofa 'o e fa'ahita'u matalá 'i he Temipale Sikueá. 'Oku fakafo'ou 'e he fa'ahita'u matalá 'a e māmá mo e mo'uí—'o fakamanatu mai kiate kitautolu 'i he ngaahi fa'ahita'ú, 'a e mo'uí, feilaulau mo e Toetu'u 'a hotau 'Eiki mo e Huhu'i ko Sīsū Kalaisí, he "'oku fakamo'oni'i [Ia] 'e he ngaahi me'a kotoa pē" (Mōsese 6:63).

'Oku fehangahangai 'a e 'ātakai faka'ofa ko 'eni 'o e fa'ahita'u matalá 'a ia 'okú ne fakataipe e 'amanaki lelei, mo ha māmani 'oku ta'epau, faingata'a, mo puputu'u. 'E lava ke fakaongosia lahi kiate kitautolu e ngaahi fie ma'u 'o e mo'uí faka'ahó—'a e akó, ngāue ma'u'anga mo'uí, 'ohake 'o e fānaú, pule'i e Siasí mo e ngaahi fatongiá, ngaahi 'ekitiviti fakae-māmani, pea mo e mamahi 'i ha puke pe faingata'a—na'e ta'e'amanekiná. Te tau lava fēfē 'o faka'ata'atā kitautolu mei he ngaahi faingata'a mo e ngaahi me'a ta'epau ke ma'u 'a e nonga 'o e 'atama'i mo e fiefiá?

'Oku tau fa'a hangē ko e talavou fefakatau'aki mei Positoni ne pehē 'e he talanoá na'á ne kau 'i he kau kumi koula 'i Kalefōniá 'i he 1849. Na'á ne fakatau atu kotoa 'ene me'a na'e ma'ú kae 'alu 'o kumi hono monuú 'i he ngaahi vaitafe 'o Kalefōniá, he na'e talaange ki ai 'oku fonu he ngaahi kongakoula lalahí 'o 'ikai fa'a lava hano fetuku.

Ne 'osi atu e 'aho mo e 'aho mo e ohu 'e he talavou 'ene tiní he vaitafé kae hala pē. Ko e me'a pē na'e ma'ú ko ha fokotu'unga maka. Na'e loto fo'i pea 'osi 'ene pa'angá, pea teu ke tuku ā 'i he 'aho 'e taha ka na'e pehē ange ki ai 'e ha motu'a taukei he kumi koulá, "Tamasi'i, fu'u fokotu'unga maka lahi mo'oni 'a'au."

Ne taliange 'e he talavou, "'Oku 'ikai ha koula ia 'i heni. Te u foki au ki 'api."

Ne lue atu e motu'á ki he fokotu'unga maká 'o ne pehē ange, "'Oku 'i ai e koula heni. Ko e me'á pē ke ke 'ilo'i e feitu'u ke ma'u ai." Na'á ne to'o hake ha ongo fo'i maka 'o fakafepaki'i kinaua. Na'e mafahi ha taha 'o e ongo fo'i maká kae fetapaki mei ai ha ngaahi

momo'i koula 'i he huelo 'o e la'aá.

Ne fakatokanga'i 'e he talavou e fonu 'a e ki'i tangai leta 'i he kongaloto 'o e motu'á, peá ne pehē ange, "Ko 'eku kumí ha ngaahi kongakoula tatau mo ia 'i ho'o tangai, kae 'ikai ko e fanga ki'i momó."

Ne fakaava hake 'e he motu'á 'ene tangai pea sio e talavou ki loto mo 'amanaki 'oku fa'o ai ha ngaahi kongakoula lalahi. Na'á ne 'ohovale he sio na'e fonu e tangai ia he fanga ki'i momo'i koula 'e lauiafe.

Ne pehē ange 'e he motu'á, "'E hoku foha, hangē kiate au 'okú ke fu'u femo'uekina hono kumi e ngaahi kongakoula lalahí 'o 'ikai ai ke ke fakafonu ho'o tangai 'aki e fanga ki'i momo'i koula mahu'ingá ni. Kuó u tu'umalie lahi 'i he'eku kātaki fuoloa 'i hono tånaki e fanga ki'i momo'i koula ko 'ení."

'Oku fakatāta'a'i mai 'e he talanoá ni e mo'oni fakalaumalie ko ia ne ako'i 'e 'Alamá ki hono foha ko Hilamaní:

"'Oku fakahoko 'e he fanga ki'i me'a iiki mo faingofuá 'a e ngaahi fu'u me'a lalahi. . . .

". . . Pea 'oku fakafou ['e he 'Eikí] 'i he ngaahi me'a ikí . . . 'a e fakamo'ui 'o e kakai tokolahi" ('Alamá 37:6–7).

'E kāinga, 'oku faingofua pē 'a e ongoongolelei 'o Sīsū Kalaisí, neongo pe ko e hā hono lahi 'etau feinga ke 'ai ia ke faingata'á. 'Oku totonu ke tau feinga ke faingofua pehē pē mo 'etau mo'uí, 'o 'ata'atā mei he ngaahi ivi tākiekina kehé kae tokanga taha ki he ngaahi me'a 'oku mahu'inga tahá.

Ko e hā e ngaahi me'a mahu'inga mo faingofua 'o e ongoongolelei 'okú ne 'omi e mahino mo ha taumu'a ki he'etau mo'uí? Ko e hā e ngaahi momo'i koula 'o e ongoongolelei 'oku tau tātånaki 'i he fa'a kātaki lolotonga 'etau mo'uí 'o fakapale'i 'aki ai kitautolu e koloa mahu'inga tahá—'a e me'a 'ofa mahu'inga ko e mo'ui ta'engatá?

'Oku ou tui 'oku 'i ai e tefito'i mo'oni faingofua mo loloto 'e taha—mo faka'e'i'eiki foki—'okú ne fālute kakato 'a e ongoongolelei 'o Sīsū Kalaisí. Kapau te tau tali 'a e tefito'i mo'oni ko 'ení 'aki hotau lotó kotoa pea fakatefito 'etau mo'uí he taumu'a ko 'ení, te ne fakama'a mo

fakamā'oni'oni'i kitautolu ke tau toe lava 'o nofo 'i he 'ao 'o e 'Otuá.

Na'e folofola 'a e Fakamo'uí ki he tefito'i mo'oni ko 'ení 'i He'ene tali ki ha fehu'i 'a e tangata Fālesí, "Eiki, ko e fekau fē 'i he fonó 'oku lahi?"

"Pea tala 'e Sisū kiate ia, Ke ke 'ofa ki [he 'Eiki] ko ho 'Otuá 'aki ho laumālié kotoa, mo ho'o mo'uí kotoa, mo ho lotó kotoa.

"Ko e 'uluaki pea ko e lahi ia 'o e fekauí.

"Pea ko hono ua 'oku tatau mo iá, Ke ke 'ofa ki ho kaungā'apí 'o hangē pē ko koé" (Mātiu 22:36–40).

Ko 'etau toki 'ofa pē ki he 'Otuá mo Kalaisi 'aki hotau laumālié, mo'uí, mo e lotó kotoá, ko 'etau toki lava ia 'o vahevahe 'a e 'ofa ko 'ení mo hotau kaungā'apí 'i he anga'ofa mo e tokoní—'a e founga 'e 'ofa mo tokoní'i ai kitautolu 'e he Fakamo'uí kapau na'e 'i heni he 'ahó ni.

'I hono nofo'ia kitautolu 'e he 'ofa haohaoa 'a Kalaisi—pe 'ofa faka-Kalaisi—'oku tau fakakaukau, ongo'i mo ngāue ai 'o hangē pē ko e Tamai Hēvaní mo Sisú. Ko 'etau taumu'á mo 'etau faka'amú ke hangē pē ko e faka'amú mo e taumu'a 'a e Fakamo'uí. Na'á Ne vahevahe mo 'Ene kau 'aposetoló 'a e faka'amú ko 'ení 'i he 'aho kimu'a Hono Tutukí. Na'á Ne folofola:

"'Oku ou tuku 'a e fekau fo'ou kiate kimoutolu, Koe'uhí ke mou fe'ofa'aki kiate kimoutolu; hangē ko 'eku 'ofa kiate kimoutolú. . . .

"'I he me'á ni 'e 'ilo ai 'e he kakai kotoa pē ko 'eku kau ākongā 'a kimoutolu, 'o kapau te mou fe'ofa'aki kiate kimoutolu" (Sione 13:34–35).

Ko e 'ofa na'e fakamatala ki ai e Fakamo'uí ko ha 'ofa 'oku ngāue'i. 'Oku 'ikai fakahā 'aki ia ha ngaahi fu'u ngāue lalahi mo to'a, ka 'i he fanga ki'i ngāue faingofua 'oku fakahoko 'i he anga'ofa mo e tokoni.

'Oku lahi e ngaahi founga mo e ngaahi tūkunga 'e lava ke tau tokoní'i mo 'ofa ai ki he ni'ihí kehé. Te u foko-tu'u atu ha ni'ihí.

'Uluakí, 'oku kamata 'a e 'ofa faka-Kalaisi 'i 'api. Ko e tefito'i mo'oni mahu'inga taha 'oku totonu ke ne pule'i 'a e 'api kotoa pē ko hono



mo'uí 'aki 'o e Lao Koulá—'a e na'ina'i ko ia 'a e 'Eiki "ko e me'a kotoa pē 'oku mou loto ke fai 'e he kakai kiate kimoutolú, ke mou fai ia kiate kinautolu" (Mātiu 7:12). Ki'i fakakaukau angé pe te ke ongo'i fēfē kapau ko koe 'oku fai atu ki ai ha lea pe anga ta'e'ofa mo ta'efaka'atu'i. Tau ako'i hotau fāmilí ke nau fe'ofa'aki.

Ko e Siasí 'a e feitu'u 'e taha 'oku tau ma'u ai 'a e faingamālie ke tokoní. 'Oku totonu ke hoko hotau ngaahi uōtí mo e koló ko ha feitu'u 'oku tataki ma'u pē ai 'e he Lao Koulá 'etau ngaahi leá mo 'etau ngaahi fengāue-akí. 'I he 'etau feanga'ofa'akí, fai ha pou pou mo fakalotolahi, mo feongo-i-aki 'etau ngaahi fie ma'ú, 'e lava ke tau tokoni ke fakatupu ha 'ofa mo e uoungataha 'i he kāingalotu 'o e uōtí. Ko e fē pē ha feitu'u 'oku 'i ai e 'ofa faka-Kalaisi, 'oku 'ikai leva ke toe 'i ai ha potu ia ai mo'ó e ngutu laú pe lea ta'e'ofá.

'E lava ke fakataha e kāingalotu 'o e uōtí, 'a e kakai lalahí mo e to'u tupú, 'o fakahoko ha ngāue tokoni

mahu'inga ke faitāpuekina ai e mo'uí 'a e ni'ihí kehé. 'I he uike ua kuo hili, na'e lipooti 'e 'Eletā Mākosi B. Nesi 'o e Kau Fitungofulú, ko e palesiteni 'o e 'Ēlia Tokelau-hihifo 'o 'Amelika Tongá, 'i hono vahe atu 'a "kinautolu 'oku mālohi fakalaumālié ke nau tokanga 'i 'a kinautolu 'oku vaivaí" 'oku nau fakahaofi ai ha laungeau 'o e kakai lalahí mo e to'u tupu māmālohí. 'Oku nau foki "tahataha" mai 'i he 'ofá mo e ngāue tokoní. 'Oku hanga 'e he ngaahi ngāue anga'ofa ko 'ení 'o faka-tupu ha ha 'i 'oku mālohi mo tu'uloá 'i he taha kotoa na'e kau—'o tatau pē kiate kinautolu na'a nau fai e tokoní mo kinautolu na'e tokoní'i. 'Oku 'omi 'e he ngaahi ngāue tokoni peheé ha ngaahi manatu fiefia.

'I he 'eku manatu ki he ngaahi ta'u lahi 'o 'eku ngāue fakatakimu'a he Siasí, ko 'eku ngaahi manatu faka'ofa'ofa tahá 'a e taimi ko ia ne u ngāue fakataha ai mo e kāingalotu 'o e uōtí ke tokoní'i ha tahá.

Hangē ko 'ení, 'oku ou manatu ki he 'emau ngāue fakataha mo e



kāingalotu 'o hoku uōtí 'i he'eku hoko ko e pīsopé, 'o mau fakama'a e fu'u luo tānaki'anga me'akai 'i he faama uelofea fakasiteikí. Na'e 'ikai ko ha ngāue fakafiefia ia! Na'e kau ai ha tokotaha māmālohi kuo ta'u lahi 'ene ta'e 'alu ki he lotú, ka na'e fakaafe'i ke kau mo kinautolu. Tupu mei he 'ofa mo e feohi na'á ne ongo'i 'i he'emaui talanoa he fu'u luo namu-ha'aha'á, na'á ne foki mai ai ki he lotú pea na'e sila'i ia kimui ki hono uai'fi mo e fānaú 'i he temipalé. Kuo faitāpuekina 'ene fānaú, makapuná, mo e makapuna uá he taimí ni ko e tupu mei he'emaui feohi 'i he ngāue tokoní. Kuo ngāue fakafafekau honau tokolahi, mali he temipalé, mo 'ohake ha ngaahi fāmili ta'engata—ko ha ngāue ma'ongo'onga na'e fakahoko 'aki ha ki'i ngāue faingofua—ko ha kihii' momo'i koula.

Ko e feitu'u 'e taha 'e lava ke tau

ngāue tokoni a'i ko hotau tukui koló. 'E lava ke tau fakahā 'etau 'ofá mo e tokoní 'aki 'etau ala atu 'o tokoní 'i 'a kinautolu 'oku fie ma'u 'etau tokoní. Kuo tui 'e hamou tokolahi ha ngaahi falani Nima Fietokoni pea ngāue ta'emālōlō ke fakafiemālie'i 'a e faingata'a'ia mo fakalelei'i homou tukui koló. Na'e toki fakahoko ha ngāue tokoni 'e he kau tāutaha kei talavou 'o e Siteiki Senitai Siapani ki hono kumi 'o e kāingalotú hili 'a e mofuike mo e peaukula fakalilifú. 'Oku ta'efa'alaua e ngaahi founga ke tau tokoni a'i.

'Oku tau lava ke fakakaungāme'a mo kinautolu 'oku tau tokoní 'i 'i he'etau anga'ofá mo e fie tokoní. 'Oku tau ma'u ha mahino lelei ange ki he'etau mateaki'i 'o e ongoongolelei mei he ngaahi feohi fakakaume'a ko 'ení pea mo ha holi ke ako lahi ange fekau'aki mo e Siasí.

Na'e fakamatala hoku kaungāme'a lelei ko 'Eletā Siosefa B. Uefiliní ki he mālohi 'o e tefito'i mo'oni ko 'ení 'i he'ene pehē: "Ko e lea'ofá ko e uho ia 'o e mo'ui ma'ongo'ongá. . . . [Ko e] kī ia 'okú ne fakaava 'a e matapaá mo ohi mai hoto ngaahi kaungāme'á. 'Okú ne fakamolū 'a e lotó mo fa'u ha ngaahi fetu'utaki 'e lava ke laui kuongá" ("Ko e 'Ulungāanga Fakalangi ko e Anga'ofá," *Liahona*, Mē 2005, 26).

Ko e founga 'e taha 'e lava ke tau tokoni ai ki he fānaui 'a e Tamai Hēvaní ko e ngāue fakafafekau—'o 'ikai 'i he ngāue fakafafekau taimi kakatō pē ka 'i he'etau hoko ko he ngaahi kaungāme'a mo e kaungā'apí. He 'ikai tupulaki e Siasí ia he kaha'ú 'i he tukituki pē he matapā 'o e kakai 'oku 'ikai ke tau mahení. 'E hoko ia 'i he taimi 'oku fonu ai e kāingalotú mo 'etau kau faifekau 'i he 'ofa 'a e 'Otuá mo Kalaisí, pea nau 'ilo'i e ngaahi fie ma'ú mo tokoní 'i e faingata'a'ia 'i he laumālie 'o e ngāue 'ofá.

'I he'etau fai 'ení kāinga, 'e hanga 'e kinautolu 'oku fekumi fakamātoato ki he mo'oní 'o ongo'i 'a hotau lotu mo'oní mo 'etau 'ofá. 'E fie 'ilo lahi anga ha tokolahi kiate kinautolu. Ko e toki taimi pē ia 'e mafola ai 'a e Siasí 'o fakafonu e māmaní. He 'ikai lava 'eni 'e he kau faifekau 'ata'atā pē, ka 'oku fie ma'u ki ai e tokanga mo e tokoní 'a e mēmipa kotoa pē.

'Oku fie ma'u ke tau ongo'ingofua e ngaahi ue'i 'a e Laumālie Mā'oní'oní 'i he tokoni kotoa pē 'oku tau fai. 'E lava leva 'e he kihii' le' o si'í 'o talamai ke tau 'ilo 'a kinautolu 'oku fie ma'u tokoní pea mo e tokoni ke tau fai kiate kinautolú.

Na'e pehē 'e Palesitani Sipenisā W. Kimipolo: "'Oku mātu'aki mahu'inga ke tau fetokoní'aki 'i he pule'angá. . . . 'Oku tau fa'a tokoní 'o fai ha fakalotolahi pe foaki . . . pe tokoní 'i he ngaahi ngāue fakaemāmaní, ka 'oku nāunau'ia e ngaahi ola 'e lava ke ma'u . . . mei he fanga ki'i ngāue ikí!" (*Ngaahi Akonaki 'a e Kau Palesitani 'o e Siasí: Sipenisā W. Kimipolo* [2006], 101).

Kuo na'ina'i mai 'a Palesitani Tōmasi S. Monisoni:

"'Oku lahi fau e ngaahi fie ma'u 'a e ni'ihii kehé, pea 'e lava ke tau fai ha

me'a ke tokoni ai ki ha taha.

“... Ka 'ikai ke tau tokoni ki he ni'ihí kehé, ta 'oku taumu'a valea 'etau mo'uí” (“Ko e Hā Kuó u Fai Ma'á ha Taha he 'Aho ní?” *Liahona*, Nōvema 2009, 85).

'E kāinga, te u toe fakamamafa'i atu 'a e 'ulungāanga mahu'inga taha 'o e Tamai Hēvaní mo Hono 'Alo 'Ofa-angá 'a ia 'oku totonu ke tau holi mo fekumi ke ma'u ia 'i he 'etau mo'uí, 'a ia ko e me'afuaki 'o e 'ofa faka-Kalaisí, 'a e “'ofa haohaoa 'a Kalaisí” (Moroni 7:47). 'Oku tupu mei he me'afuaki ni 'a 'etau malava ke 'ofa mo tokoni ki he ni'ihí kehé, 'o hangē ko ia ne fai 'e he Fakamo'uí.

Na'e ako'i kiate kinautolu 'e he palōfita ko Molomoná 'a e mātu'aki mahu'inga 'o e me'afuaki ni mo ne fakahā mai e founa 'e lava ke tau ma'u ai iá: “Ko ia, 'e hoku kāinga 'ofeina, lotu ki he Tamai 'aki 'a e ivi kotoa 'o e lotó, koe'uhí ke fakafonu 'a kimoutolu 'aki 'a e 'ofá ni, 'a ia kuó ne foaki kiate kinautolu kotoa pē 'oku muimui mo'oni 'i hono 'Alo ko Sīsū Kalaisí: koe'uhí ke mou hoko ko e ngaahi foha 'o e 'Otuá; koe'uhí ka hoko 'a e taimi te ne hā mai á te tau tatau mo ia, he te tau mamata kiate ia 'i hono anga totonú; koe'uhí ke tau ma'u 'a e 'amanaki leleí ni; koe'uhí ke fakahaohaoa 'i 'a kinautolu 'o hangē ko 'ene haohaoá” (Molonai 7:48).

'Oku fakahoko ha ngaahi me'a lalahi 'o fakafou 'i he fanga ki'i me'a iiki mo faingofuá. Hangē ko hono tātānaki 'o e fanga ki'i momo'i koulá 'i ha taimi lahi 'o hoko ko ha koloa lahí, 'e pehē pē hono tātānaki 'etau fanga ki'i tokoni 'oku fai 'i he anga 'ofá mo e tokoni 'o hoko ko ha mo'uí 'oku fonu 'i he 'ofa ki he Tamai Hēvaní, mateaki 'i 'o e ngāue 'a e 'Eiki ko Sīsū Kalaisí, mo e ongo'i nonga mo fiefia 'i he taimi kotoa pē 'oku tau fetokoni'aki á.

'I he 'etau ofi atu ko 'eni ki he fa'ahita'u 'o e Toetu'ú, fakatauange ke tau fakahā 'etau 'ofa mo e hounga'ia 'i he feilaulau fakalelei 'a e Fakamo'uí 'aki 'a e fanga ki'i ngāue 'ofa mo e tokoni ki hotau ngaahi tuonga'ane mo e tuofāfine 'i 'apí, 'i he siasí, pea 'i hotau tukui koló. Pea 'oku ou lotua ia 'i he loto fakatōkilalo, 'i he huafa 'o Sīsū Kalaisí, 'ēmeni. ■



Fai 'e 'Eletā Neil L. Andersen

'O e Kōlomu 'o e Kau 'Aposetolo 'e Toko Hongofulu Mā Uá

Ko Hono Teuteu'i 'o e Māmaní ki he Hā'ele 'Angauá

'E hoko ho' o ngāue fakafaipekaú ko ho faingamālie toputapu ke 'omi e ni'ihí kehé kia Kalaisí pea tokoni ke teuteu'i kinautolu ki he Hā'ele 'Angaua mai 'a e Fakamo'uí.

Oku ou lea he pooni 'o tautau-tefito ki he ni'ihí ta'u 12 ki he 25 'oku nau ma'u e lakanga fakataula'eiki 'o e 'Otuá. 'Oku mau fa'a fakakaukau mo lotua ma'u pē kimoutolu. Ne u 'osi faiatu kimu'a e tala-noa ki hono teke 'i 'e hoku mokopuna tangata ta'u faá 'a hono ki'i tehiná. Hili hono fakafiemālie 'i e tangi 'a e ki'i tamasi'í, ne fehu 'i ange 'e hoku uaifi ko Kefí ki he ki'i ta'u faá, “Ko e hā na'á ke teke 'i ai ho ki'i tehiná?” Na'á ne sio ki he'ene kuifefiné peá ne tali ange, “'E Nena, fakamolemole. Ne mole hoku mama FKT pea 'ikai ke u lava 'o fili ki he totonú.” 'Oku mau 'ilo 'i 'oku faingata 'a ke fili ma'u pē ki he totonú. 'Oku mau 'ofa lahi atu kiate kimoutolu.

Kuo 'i ai nai ha taimi kuo mou fakakaukau ai pe ko e hā ne 'omi ai kimoutolu ki he māmaní 'i he taimi ko 'en? Ne 'ikai fá'ele 'i kimoutolu he taimi 'o 'Ātama mo 'Iví, pe lolotonga

e pule 'a e kau feló 'i 'Isipité, pe lolotonga e pule 'a e Ha'a Tu'i Ming. Kuo mou ha'u ki he māmaní 'i he kuongá ni hili ia ha senituli 'e 20 meihe fuofua hā'ele mai 'a Kalaisí. Kuo toe fakafoki mai e lakanga fakataula'eiki 'o e 'Otuá ki he māmaní, pea kuo ala mai e to'u-kupu 'o e 'Eiki ke teuteu'i 'a māmaní ki He'ene toe hā'ele nāunau'ia maí. Ko e kuonga 'eni 'o e ngaahi faingamālie ma'ongo'ongá mo e ngaahi fatongia mahu'inga. Ko homou kuongá 'eni.

'I ho papitaisó, na'á ke fakahaa 'i ai 'a ho' o tui kia Sīsū Kalaisí. 'I hono fakanofu koe ki he lakanga fakataula'eiki, kuo fakalahi atu ai ho ngaahi talēnití mo e ngaahi me'a fakalaumālie te ke malavá. Ko e taha ho ngaahi fatongia mahu'ingá ko e tokoni ke teuteu'i 'a e māmaní ki he Hā'ele 'Angaua mai 'a e Fakamo'uí.

Kuo fili 'e he 'Eiki ha palōfita, 'a Palesitēni Tōmasi S. Monisoni, ke tatakí 'a e ngāue 'a Hono lakanga